



Kampanja

„16 dana aktivizma protiv rodno zasnovanog nasilja“

Svaka zajednica po jedno rješenje

Kampanja 16 dana aktivizma protiv rodno zasnovanog nasilja i ove godine okuplja lokalne zajednice širom Federacije Bosne i Hercegovine oko zajedničkog cilja – stvaranja sigurnijeg okruženja za žene i djevojčice, offline i online. Savez općina i gradova FBiH pridružuje se globalnim naporima s posebnim fokusom na digitalno nasilje, koje postaje sve prisutniji i ozbiljniji oblik ugrožavanja prava, dostojanstva i sigurnosti žena i djevojčica.

Lokalne zajednice imaju ključnu ulogu u prevenciji nasilja i pružanju podrške onima koje nasilje pogađa. Zato ove godine ističemo poruku: „Svaka zajednica po jedno rješenje“ – jer i najmanji korak može pokrenuti velike promjene, inspirisati druge i ojačati ukupni sistem zaštite.

Cilj nam je prikazati stvarne i djelotvorne prakse koje doprinose sigurnosti žena i djevojčica, te istovremeno mogu poslužiti kao inspiracija drugim općinama i gradovima. Zajedno pokazujemo da je promjena moguća kada svaka zajednica doprinese svojim rješenjem.

Zajedno gradimo BiH u kojoj nasilju nema mjesta – ni na internetu, ni u stvarnom životu.



OPĆINA NOVI GRAD SARAJEVO

Općina Novi Grad Sarajevo i ove godine aktivno doprinosi obilježavanju kampanje „16 dana aktivizma protiv rodno zasnovanog nasilja“ kroz podršku tri projekta Centra za edukaciju i istraživanje Nahla.

Nahla je dugogodišnji i prepoznat partner u oblasti obrazovanja odraslih i društvenih istraživanja, s posebnim fokusom na osnaživanje žena i mladih kroz edukaciju, umrežavanje, savjetodavnu i poslovnu podršku, unapređenje zdravlja, te sport i rekreaciju.

Kao i prethodnih godina, Nahla i ove godine realizuje niz aktivnosti povodom kampanje. U nastavku donosimo pregled ključnih programskih sadržaja:

Finansijske vještine za život

<https://nahla.ba/.../finansijske-vjestine-za-zivot.../>

Kako prepoznati i reagovati na nasilje na radnom mjestu?

<https://nahla.ba/.../kako-prepoznati-i-reagovati-na.../>

Psihološka otpornost i samopouzdanje kao zaštita od nasilja i diskriminacije

<https://nahla.ba/.../psiholoska-otpornost-i.../>

Kako ne postati žrtva nasilja u vezi

<https://nahla.ba/kako-ne-postati-zrtva-nasilja-u-vezi.../>

Uloga religija u zaštiti žena od nasilja

<https://nahla.ba/kursevi/medjureligijski-panel-svi-smo-pozvani-odgovornost-vjernika-ca-i-vjerskih-zajednica-u-zastiti-zena-od-nasilja/>

Radno mjesto gdje ljudi žele ostati: kako izgraditi radnu kulturu u kojoj se svi osjećaju sigurno

<https://nahla.ba/kursevi/radno-mjesto-gdje-ljudi-zele-ostati-kako-izgraditi-kulturu-sigurnosti-postovanja-i-jednakih-prilika/>

Podrška Općine Novi Grad Sarajevo vršnjačkoj radionici o digitalnom nasilju

Općina Novi Grad Sarajevo podržala je realizaciju vršnjačke radionice u saradnji s Udruženjem „Nova generacija“ i Dječijim parlamentom Općine Novi Grad Sarajevo, povodom globalne kampanje „16 dana aktivizma protiv rodno zasnovanog nasilja“.

Radionica je održana 10. decembra 2025. godine u Centru za edukaciju, sport i rekreaciju „Safet Zajko“, a vodila ju je Najda Hajdarević, članica Savjeta djece i mladih



Plavog telefona. Fokus radionice bio je na digitalnom nasilju, s posebnim naglaskom na rodno zasnovano digitalno nasilje.

Tokom radionice obrađene su sljedeće teme:

- šta je digitalno nasilje i rodno zasnovano digitalno nasilje,
- kako prepoznati rizične situacije u online okruženju,
- posljedice digitalnog nasilja na djecu i mlade,
- kome se mogu obratiti za pomoć i podršku.

Učesnicima/ama su predstavljani i resursi Plavog telefona – savjetodavne linije za djecu i mlade – te načini na koje mogu potražiti stručnu i povjerljivu podršku.

Prije zvaničnog početka radionice organizovano je i kratko druženje učesnika s Marcom Lucetom, predstavnikom UNICEF-a u Bosni i Hercegovini, koji je razgovarao s mladima i odgovarao na pitanja o digitalnom nasilju.

Ova aktivnost doprinijela je osnaživanju djece i mladih, jačanju njihove informisanosti i izgradnji sigurnijeg online okruženja.



OPĆINA CENTAR SARAJEVO

Općina Centar Sarajevo realizovala je značajan događaj posvećen temi femicida pod nazivom „Femicid: razumijevanje, prevencija i društvena odgovornost“.



Događaj je otvorio načelnik Srđan Mandić, istaknuvši važnost kontinuiranog i otvorenog razgovora o nasilju nad ženama, te naglasivši društvenu odgovornost lokalnih zajednica u pokretanju ovakvih tema.

Posebnu vrijednost događaju dali su učenici i učenice osnovnih i srednjih škola koji su učestvovali u kreativnoj radionici i nagradnom konkursu. Najboljim učesnicima/ama uručene su zahvalnice i poklon bonovi, kao podsticaj za njihovo razumijevanje i angažman u ovoj važnoj društvenoj temi.

Ovim događajem Općina Centar Sarajevo još jednom je potvrdila svoju posvećenost otvaranju teških, ali ključnih društvenih pitanja i uključivanju mladih u procese koji doprinose sigurnijoj i pravednijoj zajednici.



OPĆINA MAGLAJ

Komisija za mlade i ravnopravnost polova Općinskog vijeća Maglaj, u saradnji s Centrom za socijalni rad Maglaj, provela je dvodnevne aktivnosti povodom Međunarodne kampanje „16 dana aktivizma protiv rodno zasnovanog nasilja“.

Aktivnosti su realizovane 3. i 5. decembra 2025. godine kroz postavljanje info-štanda, dijeljenje informativnih letaka s porukom „Stop nasilju nad ženama“ i narandžastih trakica kao simbola podrške.

Cilj aktivnosti bio je podići svijest građana i građanki o problemu nasilja nad ženama i djevojčicama, te potaknuti zajednicu na prepoznavanje, prijavljivanje i sprječavanje svih oblika nasilja. Poseban fokus stavljen je na mlade, s ciljem da se ojača njihova informisanost, potakne aktivno sudjelovanje u borbi protiv nasilja i doprinese izgradnji odgovornije i sigurnije zajednice.



Također, u narednom periodu planirana je radionica na temu „Digitalno nasilje nad ženama i djevojčicama“, koju će voditi psiholozi i pedagozi s područja Općine Maglaj, s fokusom na prepoznavanje, prevenciju i dostupne vidove podrške.



OPĆINA NOVO SARAJEVO

Općina Novo Sarajevo aktivno se pridružila globalnoj kampanji „16 dana aktivizma protiv rodno zasnovanog nasilja“ s ciljem podizanja svijesti o važnosti prevencije nasilja, zaštite žrtava, te jačanja zajedničkog društvenog odgovora na jedan od najtežih problema današnjice.

U okviru obilježavanja kampanje, u šalter sali Općine Novo Sarajevo, u saradnji s Fondacijom lokalne demokratije, organizovana je promotivna aktivnost. Građanima/kama su pružene informacije o dostupnim servisima podrške, načinima prijave nasilja i ulozi lokalne zajednice u pružanju pomoći žrtvama. Prostor šalter sale simbolično je obilježen vizuelnim elementima kampanje kako bi se dodatno skrenula pažnja na važnost preventivnog djelovanja i solidarnosti.

Općina Novo Sarajevo nastavlja osiguravati da lokalna zajednica bude sigurno mjesto za sve svoje građane/ke. Tokom trajanja kampanje, građanima/kama su dostupne informativne brošure, brojevi hitnih službi i SOS linija, kao i smjernice o tome kako



potražiti pomoć ili prijaviti nasilje – bilo u vlastitom domu, zajednici ili radnom okruženju.



Primjeri dobre prakse iz lokalnih zajednica Federacije BiH pokazuju da svako, od institucija do pojedinaca, može doprinijeti sigurnijem okruženju za žene i djevojčice.

Pozivamo sve lokalne zajednice da nastave razvijati vlastita rješenja, dijele svoja iskustva i inspirišu druge. Kada svaka zajednica preuzme odgovornost, zajedno stvaramo društvo u kojem nasilje nema mjesta – ni u stvarnom svijetu, ni online.

Zajedno možemo više. Zajedno čuvamo sigurnost i dostojanstvo svih žena i djevojčica.

Savez općina i gradova Federacije Bosne i Hercegovine

